

四庫全書

史部

欽定四庫全書

史部

唐大詔令集卷三十六

九六至

詳校官編修<sub>臣</sub>范來宗

編修<sub>臣</sub>裴蘄覆勘

總校官編修<sub>臣</sub>倉聖脉

校對官學正<sub>臣</sub>常循

謄錄監生<sub>臣</sub>甯汝欄

欽定四庫全書

唐人詔令集卷三十六

宋 宋敏求 編

諸王

除親王官

慶王潭涼州都督制

慶王琮司徒制

榮王琬安北大都護制

命三王制

停潁王等節度誥

越王係天下兵馬元帥制

奉節郡王适天下兵馬元帥制

普王誼荆襄江西等道兵馬都元帥制

虔王諒申光節度制

彭王僅等河西節度大使制

嘉王運橫海軍節度制

撫王紘河東節度制

嘉王運等檢校司空制

遂王宥彰信軍節度制

濮王澤成德軍節度制

昭王汭成德軍節度制

撫王紘開府儀同三司守司空制

蜀王倓西川節度制

建王震魏博節度制

除親王官

慶王潭涼州都督制

朕欽承丕緒司牧黎元訟息刑清遠安邇肅恩誼弘備  
式樹藩維列鎮而考其政聲謀帥而訓其戎旅徵皇漢  
之故事並建親賢採分陝之遺塵化行江汜爰崇磐石  
永固宗祧慶王潭等並稟秀玉林分華瓊苑夙彰韶譽  
久踐義方閱禮敦詩好賢樂善履忠肅而無替遵法度  
而不愆器蘊謀猷才兼文武任茲連帥統彼元戎幹畧

攸歸能賢是擇分麾作鎮受鉞專征式茂朝章宜恭嘉  
命以慶王潭為梁州都督兼河西節度大使忠王浚為  
單于大都護朔方節度大使棣王洽為大原以北軍州  
節度大使鄂王潤為幽州大都督兼河北諸州節度大  
使榮王滉為京兆牧兼隴右節度大使光王浚為廣州  
都督兼嶺南經畧大使儀王維為河南牧潁王漣為安  
東都護平盧軍節度大使永王澤為荊州大都督壽王  
清為益州大都督兼劍南節度大使延王湊為安西大

都護兼四鎮節度大使盛王沭為揚州大都督

開元十五年三月

月

慶王琮司徒制

門下汝作司徒以親百姓予有禦侮爰整六師中外之  
寄藩維是屬太子太師兼涼州大都督河西諸軍州節  
度大使度支營田九姓長行轉運使上柱國慶王琮克  
勤於躬允協厥訓每有志於敦學常不忘於樂善事上  
之道忠順在焉舉能之義親踈一也固可委以邦教受

之廣謀勉圖乃功勿替朕命可守司徒餘如故

開元二十四年

### 榮王琬安北大都護制

街畫輿壤戎夏所交兵鎮專城藩衛攸重開府儀同三司兼涼州牧單于大都護充持節朔方節度使副大使榮王琬溫仁植聖孝友因心言必備於忠肅動必循於德義爰就師傅學行可觀載錫珪符名器斯允移鄂築壘功存禦侮距河臨塞拒切雄邊僉論所歸式遏斯寄宜加外總之命伴授中權之畧可兼安北大都護餘並

如故

天寶八年二月

命三王制

賈至

門下我唐受命百有四十載德澤浸於荒裔聲教被於殊鄰紹三代之統緒綜百王之禮樂我高祖神堯皇帝奄有大寶應天順人我太宗文武聖皇帝戡難造邦光宅天下高宗天皇大帝修文偃武惠綏四方我中宗孝惠皇帝聿遵孝德惟新景命我睿宗大聖真皇帝清明在躬玄化溥暢朕承累聖之洪訓荷祖宗之丕緒兢兢

業業不敢自寧往歲韋氏作逆宗社將隳是用翼戴先  
后掃蕩兇徒宸極既貞寰區載晏爾來在位垂五十年  
中原幸無師旅戎狄歲月朝貢夙興旰食勤念蒼生庶  
弘至禮以躋仁壽愧無帝堯之聖德而有竒鯨之不明  
致令賊臣內外為患蔽朕耳目遠朕忠良或竊弄威權  
或厚歛重賦蟻壤一漏成此滔天構逆召戎馳突中夏  
傾覆我河洛撓亂我崑函使衣冠奔竄於草莽黎庶狼  
狽於鋒鏑伊朕薄德不能寧謐厥禍海內負茲蒼生是

用罪已責躬寤寐焚灼上愧於天地下愧於兆人外愧  
乎四夷內愧乎九族乾惕若厲思雪大恥夫定禍亂者  
必仗於羣才理國家者先固其根本太子亨忠肅恭懿  
閱禮敦詩好勇多謀加之果斷永王璘盛王琦豐王珙  
皆孝友謹恪樂善好賢雖頃在禁中未習政事察其圖  
慮可試艱難夫宮相之才師傳望必資賢哲永厲忠貞  
況四海多虞二京未復今所慎擇實惟其人太子亨宜  
允天下兵馬元帥仍都統朔方河東河北平盧等節度

採訪等都使與諸路及諸副大使等計會南收長安洛陽以御史中丞裴冕兼左庶子隴西都司馬劉秩試守右庶子永王璘充山南東道江南西路嶺南黔中等處節度支度採訪等都使江陵大都督如故以少府監竇韶為之副以長沙郡太守李峴為都副大使仍授江陵郡大都督府長史兼御史中丞盛王珣宜充江陵郡大都督尉長史彙為之副以廣陵郡長史李成式為都副大使兼御史中丞豐王珙宜充武威郡都督仍領河西

隴右安西北庭等路節度支度採訪等都使以隴西太  
守鄧景山為之副兼武威郡都督長史御史中丞充副  
大使應須兵馬甲仗器械糧賜等並於本路自供其諸  
路本節度採訪防禦等使毓王等並依前充使其署官  
屬并本路郡縣官並各任自揀五品已上置署訖聞奏  
六品已下任便授已後一時聞奏其授京官九品已上  
並先夾名卷聽進止其武官折衝已下並賞借緋紫任  
量功使處訖具聞奏具有文武奇才隱處山藪宜加辟

命量事獎擢於戲咨爾元子等其敬聽朕命謙恭祗敬  
以見師傅矜莊簡肅以見衆官慈恤惠愛以養百姓忠  
恕哀敬以折庶獄色不可犯以臨軍政犯而必恕以納  
忠規往欽哉無替朕命各須所管咸令知悉

天寶十五  
載七月十

日

### 停潁王等節度誥

誥鑒門命將授鉞專征伐以方面之威執夫賞罰之柄  
邦家重任固實在茲潁王永王豐王等朕之諸子早承

訓誨琢磨詩書之教佩服仁義之方樂善無厭好學不倦頃之委任咸緝方隅今者皇帝即位親統師旅兵權大畧宜有統承庶若網在綱惟精惟一頴王以下節度使並停其諸道先有節度等副使便令知事仍並取皇帝處分李峴未到江陵永王且莫離使待交付兵馬了永

王豈王並赴皇帝行在

至德元年八月二十一日

越王係天下兵馬元帥制

握兵之要古先為重命帥之道心膂攸憑是知靖難夷

寇必資於兵革總戎受律寔仗於親賢蓋將又寧邦家保  
息黎獻者矣朕以薄德纘承鴻緒往屬元兇圖亂中夏不  
寧上憑宗社之靈下藉熊羆之力由是志清咸洛拯此生  
人頃以河朔殘妖尚稽天討虵豕竊留於城堡塗炭久被  
於齊眠朕以為人父母寧忘憫念雖好生息戰必冀於歸  
降而餘孽昧心靡聞於悔過所以軒后親征於獯鬻周文  
致役於昆夷古之用兵蓋非獲已越王係幼稟異操風懷  
韜畧負東平之文學蘊任城之知勇性惟忠孝持愛敬以

立身志尚權謀有經通之遠志知子者父方有屬於維  
城擇能而授俾克申於戎律且兇徒嘯聚頗厯歲月惡  
既貫盈理當撲滅君親有命可不敬乎俾展龍豹之韜永清  
梟獍之類可充天下兵馬元帥應緣軍署處置所司准式

乾元  
年

奉節郡王适天下兵馬元帥制

門下國之大事戎寄為先朝有舊章親賢是屬故求諸  
必當用制於中權存以至公豈慚於內舉特進奉節郡  
王适天資淳懿夙表岐嶷深謀秘畧可謂生知樂善近

仁非由外獎檢身以禮率性惟忠將有事於四方且申  
爾志俾啟行於十乘式佇其能故可敬慎厥猷勤宣乃  
力克奉君親之命載清寇孽之餘允副僉諧宜從茲授  
可天下兵馬元帥餘如故

寶應元年四月十一日

普王誼荆襄江西等道兵馬都元帥制

勅君人立極所務於勝殘秉律成師實先於謀帥申明  
號令總制紀綱弘九合之功決百勝之畧非慎簡不可  
以濟事非僉屬不可以臨人集大勲者必振其宏綱體

至公者無避於內舉爰擇藩翰俾掌元戎開府儀同三司舒王謨性本忠厚訓知禮樂居常樂善動不違仁察其內恕外溫必能安人和衆體方識敏諒可成功庶乎知予之明授以貞師之律可揚州大都督持節荆襄江西沔鄂等道節度使諸軍行營兵馬都元帥餘如故賜名誼改封普王嗚呼小子誼其敬聽朕命國家之有天下百七十載於茲矣祖宗垂化紹統功德維茂威加殊俗惠洽普天海隅蒼生代受亭育躋之於福壽照之以

和平源廣流長慶深祚遠歷數有嗣續乎朕躬兢兢業  
業懼不負荷虔恭寅畏歲五周星循列聖之耿光稽上  
古之明訓一物失所是用疚心萬方有罪每懷咎已懸  
法皆考於天則舉事必酌於人謀期合大中罔徇私欲  
而涉道猶淺燭理未明文闕於化成武乏於定亂刑賞  
失中授任乖方厚澤未均大信未著致使兇慝熾禍干  
紀亂常悖逆君親蔑棄天地盜據我郡邑毒痛我士庶  
驅脅丁壯暴骸於原野攘奪羸老轉死於溝壑忠良殞

命義烈銜冤迫以克威莫能自奮憤深骨髓怨結蒼旻  
朕所以中宵屢興中食三嘆哀蒼生之無告憫赤子之  
非辜為人父母寧忘愧悼賴三事大夫竭誠於內羣帥  
爪牙宣力於外交修不逮日冀康寧江漢上游建瓴制  
寇亘千里之地連十萬之師保定大功宜有統一允副  
茲選往哉汝諧無以貴驕人無以善自伐無縱已之欲  
無拂衆之謀納諫如流改過不吝卑躬降志以奉賓傳  
絕甘分少以撫軍旅布誠信以歸人心明賞罰以盡士

力詰亂誅暴茂昭乃勲敬事恤人無替朕命膺茲重任

豈不勉歟

建中四年九月二十六日

虔王諒申光節度制

門下自昔哲王疆理天下必選時明德樹之宗親參制藩維夾輔王室賢戚並建時惟欽哉長淮之西厥壤千里人靡寧息於茲歷年朕夙夜永懷慘若焚灼思得良帥代予安人釋其危疑彰以信惠以親而授其在於茲開府儀同三司虔王諒性本溫恭生知忠孝祗服訓導

忠信不渝言皆副誠動必求當端慎可以化俗寬厚可  
以長人庇綏一方庶無憂厲可申光隨蔡等州節度大  
使兼充管内觀察使開府封如故

彭王僅等河西節度大使制

古之哲王宅中御宇莫不內封子弟外建藩維故周稱  
百代仰聞麟趾之美漢命六王亦樹犬牙之制歷考前  
載率惟舊章朕以薄德繼承鴻緒屬豺狼未殄金革猶  
虞賴文武蓋臣協心同德庶克清於玄祲期永保於皇

圖且授鉞分符義已先於用武維城作翰道方弘於建  
親咨爾分閭之崇成余磐石之固彭王僅等銀潢育慶  
壻萼分輝忠孝稟於天成文武稱其備用今三秦之地  
萬國來庭誠宜列皇子以建封崇懿藩而制勝資其固  
本委以臨戎彭王僅可充河西節度大使兗王儻可充  
河北庭節度大使涇王佖可充隴右節度大使邵王愧  
可改封蜀王充邠寧鄜節度大使杞王倕可充陝西節  
度大使興王侑可充隴右鳳翔節度大使必能輯和戎

律慎守封疆外協樽俎之謀中為社稷之衛是以分麾  
命社革故取新用叶天地之符俾膺家國之任共蕃王  
室可不慎歟

乾元二年  
閏四月

嘉王運橫海軍節度制

陸贄

門下度土分疆設官蒞事因時立制期在理安必順物  
宜且從人欲版圖既溢則疏邑以制州統攝或乖則分  
部而建長沿革之道亦何常哉滄海之隅地饒俗阜隱  
然此土寔曰雄藩鎮撫之宜是資賢戚開府儀同三司

嘉王運氣本淳清重承先訓忠肅孝友宣慈惠和勤於  
服儒樂在為善施於任事必有可觀舉不失親至公斯  
在欽率厥職永孚於休可橫海軍節度大使滄景觀察  
處置開府如故

撫王紘河東節度制

門下肇自周漢至於國朝莫不建立親賢以為藩衛擇  
茲春哲撫鎮北門舉是彝章式協公議撫王紘志量端  
平體識沉遠毓德早聞於詩禮成器可比於珪璋居然

岐嶷之姿雅有信厚之譽是宜獎其令美授以旌旄況  
全晉雄藩興王故地屏護狄塞統制甲兵撫循繫將領  
之才居守藉公侯之重一昨師徒擾叛帥令不遵用爾  
遙臨以綏其衆爾宜持嚴而務恕約法而推誠戒之慎  
之載揚丕績可開府儀同三司充河東節度觀察處置  
等使兼太原尹北都留守封如故主者施行

嘉王蓮等檢校司空制

書載堯典首稱睦族詩歌周德實美維城朕嗣統百王

憲章三代義雖本於叙族道無愧於尊賢式遵舊章爰  
舉成命嘉王運循王通恭王通等皆孝敬恭懿敏裕齋  
莊播蘭茝之清芬炳珪璋之符瑞易凌沛獻詩掩楚元  
古人素風造次於是昔賢典訓周旋以之固可以超金紫之  
貴階升台鉉之崇秩策勲詔爵以寵分茅並可金紫光  
祿大夫檢校司空賜上柱國仍依百官例給料錢

遂王宥彰信軍節度制

國家承周漢之制疏子弟之封雖典冊載先而名實或

異故有從中統外授鉞臨戎推公則然所寄尤重遂王  
宥學禮承訓樂善知方能遵六經之文克慕三雍之對  
有堅明可以蒞衆有惠和可以撫人淮右列藩地綿千  
里比喪戎帥慎擇能臣裨佐之中勤効可錄師徒知義  
勇之節封部致肅清之安朕嘉其誠懇委以留府尚乃  
休懿宣於殿邦威重遠資於撫臨絹綏不勞於事任副  
明德茂親之選膺建侯樹屏之崇爾惟欽哉往踐厥職  
可開府儀同三司彰信軍節度管内支度營田申光蔡

等州觀察處置等使

元和五年二月

濮王澤成德軍節度制

門下錫珪立社疎戚有倫畫野分疆親賢並建所以左  
右王室保乂邦家乃眷冀方寔為雄鎮上垂昴宿下接  
岳靈控陞井之要衝當邯鄲之故地用是稽諸古訓考  
以國章俾崇尚德之規式叶至公之選濮王澤延慶金  
枝衍流天派資忠孝以植性本仁義以立躬文擬菁英  
敏有逾於七步學探旨要對必詳於三雍刻舟志邁於

蒼舒占雨識精於沛獻而冲謙自處矜伐不萌所宜作  
我翰垣副茲毗寄為臣之道爾既克修知予之言予復  
何愧築齋壇以命邦杖武節以遙臨爾其弘傳俎之嘉  
謀令折衝之遠畧寵膺十乘位列三台勉服新恩慎守  
厥職可開府儀同三司守潁州大都督充成德軍節度  
鎮冀深趙等州觀察處置等使封如故

大中九年正月二十四日

昭王訥成德軍節度制

門下近制諸侯薨歿朝廷或命其子弟嗣守爵土且慮

職卑望輕未能彈壓軍行乃詔親王為帥以統臨焉蓋  
尚體行權之旨也昭王訥貞祥所聚姿質幼茂孝敬天  
授溫文日宣寧勞保傳之規自識君親之道學禮不倦  
發言有章式光維城宜假分閫朕以趙地名服常山與  
區人多忠樸俗尚義勇少長有禮里閭自康屬帥臣云  
亡戎府無長中權劇務已委諸甥上將崇名允歸愛子  
顧梁固以雄處末漢節以遙臨禍柱舊封某土新命歡  
不阻於膝下詔榮宣於庭中邦家有光藩屏斯盛九命

伴尊於開府一方遠奉於建才實惟至公勉服丕訓可  
開府儀同三司守鎮州大都督充成德軍節度鎮冀深  
趙等州觀察處置等使封如故主者施行

大中十一年  
八月二十日

撫王紘開府儀同三司守司空制

獨孤霖

門下尚德尊賢與親親而並建崇階顯位表授受以為  
庸斯所以憲章堯心損益周家自家刑國旬公絕私率  
是而行可謝前古撫王紘生知孝悌夙稟忠和茂曹植

之春華詞刊枝葉體河間之秋實學洞根元況律度自  
持韋絃相顧不斯須以忘善不造次以違仁固可以命  
於典譽光其簡策馭貴式登於極品承榮允踐於上公  
敬而戒之無忝我高祖太宗之丕訓可開府儀同三司  
司空依前百官例給俸料兼令所司擇日備禮冊命主  
者施行

咸通四年正月

蜀王佖西川節度制

自古聖帝明王莫不封建子弟錫以茅土寵以珪符俾

藩屏王家翰維天邑朕每讀麟趾識詩人之意念犬牙  
知漢祖之心眷乃坤維實維輿壤甲車雄盛貨殖形繁  
鈴越雋則南詔憚嚴鍵松維則西戎畏懼是用授親賢  
而統制命良將以經邦緬彼遠方稱茲公共蜀王信宇  
量弘廣風神粹和承顏於日域之中稟訓於大庭之內  
弱不好弄居無愠容語言皆質於詩書造次不離於孝  
敬蟻封占雨嗣沛獻之明規象艦知斤繼蒼舒之敏智  
屬者南蠻入寇西蜀纏兵瘡痍生縣道之間荊棘繫師

徒之役雖英儒鎮禦火既撲於燎原而權道改張瑟難  
遵於膠柱由是假爾英畧光予翰垣分玉葉之清陰覆  
銅梁之重地遙資筭畫密受韜鈴必使萬井歡聲三軍  
懷德致藩夷之稽顙革蠻獫之非心將陟永圖在舉長  
策對揚休命爾其敬之可開府儀同三司兼成都尹劍  
南西道節度副大使知節度使管内觀察處置統押近  
界諸番及西山八國雲南安撫等使

咸通十一年七月

建王震魏博節度制

門下玉斗七星降作帝王之子金枝百代生為列聖之  
孫冬夏教以詩書春秋訓以禮樂然後封其茅土示以  
寵光建王震天賦明哲氣稟粹和含日月之華英縕山  
河之瑞秀心懸壽鏡腹貯學川智燭不炳而自明惠車  
非駕而引重信逾剪葉名掩刻舟九苞之鳳翔赤霄五  
色之麟行丹地瑤池仙派非百水之同流銀漢靈原自  
三天而別注况幼稟師訓生知義方洊雷之象克明元  
良之名益著四德咸備三善永全喻葛藟之延長表瓜

徙之昌熾仁義道振忠孝聲聞似睹卿雲如觀景宿堪  
膺寵權可賜爵封列國之榮暫領雄藩宜遵故事可授  
開府儀同三司守太保充魏博節度管内觀察處置軍  
使兼魏州大都督府長史仍令所司擇禮冊命王者施

行

中和二年二月

唐大詔令集卷三十六

欽定四庫全書

唐大詔令集卷三十七

宋 宋敏求 編

諸王

冊親王官

冊秦王天策上將文

冊許王孝秦州都督文

冊趙王福青州刺史文

冊鄧王元裕襄州刺史文

冊號王鳳宋州刺史文

冊紀王慎澤州刺史文

冊杞王金鄺州刺史文

冊曹王明梁州都督文

冊郇王素節申州刺史文

冊紀王慎荊州都督文

冊周王顯并州都督文

冊號王鳳青州刺史文

冊曹王明號州刺史文

冊江王元祥鄜州刺史文

冊殷王旭輪單于大都護文

冊紀王慎邢州刺史文

冊曹王明豫州刺史文

冊趙王福梁州都督文

冊周王顯左衛大將軍文

大歷五年冊親王出將文

大歷六年冊親王出將文

冊親王官

冊秦王天策上將文

維武德四年歲次辛巳十一月甲申朔二日乙酉皇帝  
若曰於戲咨爾太尉尚書令左右武侯大將軍陝東道  
行臺尚書令涼州總管秦王某夙標器望早樹風猷業  
創經綸功高運始重以廓清秦隴剪伐鯨鯢掃蕩河汾

斐夷凶逆周韓大盜趙魏逋誅二寇弗賓用阻朝化嚴  
兵輦洛總率戎麾內運奇謀外申威畧凶渠懾竄假命  
危城河朔蟻徒來相赴援一鼓誓衆以擒建德迴戈旋  
指遂獲王充二方克定師不再舉節武既宣朝風遐暢  
宏規懿績獨冠卿尹宜錫寵章式加殊號光備禮物特  
起恒典是用命爾為天策上將位王公上領司徒陝東  
道大行臺尚書令增邑二萬戶通前三萬戶餘如故加  
賜金輅一乘袞冕之服玉璧一雙黃金六千斤前後二

部鼓吹及九部之樂班劍四十人欽哉恭承寵命可不慎歟

冊許王孝秦州都督文

維顯慶元年歲次景辰十二月辛卯朔二十八日己未  
皇帝若曰於戲先王創業垂統分玉展親所以作固鴻  
業克隆景祚惟爾并州都督兼同州刺史上柱國許王  
孝性履明裕神志清遠資孝敬以立身體溫恭以成性  
舊許是宅藩屏之寄以深全晉剖符維城之任愈切秦

隴形要跨躡羗戎撫寧夷夏親賢攸屬是用命爾為使  
持節都督秦成武渭四州諸軍事秦州都督勲官封如  
故爾其祇承典訓審慎刑獄懷遠以德招攜以禮無過  
宵人無怠庶政對揚休命可不慎歟

冊趙王福青州刺史文

維顯慶二年歲次丁巳正月庚申朔二十一日庚辰皇  
帝若曰於戲夫姬周創制任隆方伯炎漢垂範寄重維  
城所以任固邦基以藩王室惟爾右衛大將軍使持節

鄜州諸軍事鄜州刺史趙王福識度夷雅器業沉秀建  
鳥旗以作牧錫虹珪以命祚蘭錡上將既屬宗英海岱  
剖符允鍾懿戚是用命爾為使持節青州刺史其大將  
軍及封並如故爾其愛人理物慎獄恤刑率由王道以  
康庶績祇服寵命可不慎歟

冊鄧王元裕襄州刺史文

維顯慶三年歲次戊午正月甲申朔二十八日辛亥皇  
帝若曰於戲自九州命職百部分官爰布懿德以宣風

固親支而總務歷觀前載罔踰斯道壽州刺史上柱國  
鄧王元裕志業純深基宇崇隲標情文雅之地植操忠  
賢之軌壽春作牧風教有成襄陽按部仁明允屬是用  
命爾為使持節襄州諸軍事襄州刺史王及勲官如故  
往欽哉其勉思政本式康萌俗汚漢舊邦控帶為重變  
其輕剽之黨旌其冠冕之望孤孺者咸恤正直者必親  
威忠並宣刑禮兼闡光膺典冊可不慎歟

冊號王鳳宋州刺史文

維顯慶三年歲次戊午正月甲申朔二十九日壬子皇帝若曰於戲永固鴻基義屬於藩衛載孚王化職隆於制舉歷選前修茲道無替豫州刺史上柱國虢王鳳襟神秀發理識淹遠夙標懿範早茂清徽寬恕以表其情恭遜以成其美荆河之地已洽於仁聲梁宋之郊佇聞於善政是用命王為使持節宋州諸軍事宋州刺史王及勳官並如故往欽哉其克膺裡命式遵彝典崇孝義以訓下踐忠貞而奉上布廉平之化垂忠愛之風居敬

而行簡恤隱而求瘼惟良之丕寄可不慎歟

冊紀王慎澤州刺史文

維顯慶三年歲次戊午正月甲申朔三十日癸丑皇帝  
若曰於戲析壤分珪寄隆於宗子罷侯置守任切於惟  
良自古明王率由茲典左衛大將軍徐州刺史上柱國  
紀王慎稟慶璇源分華紫極崇詩書而軌物敦教義而  
明道入典鉤陳恭肅表於清禁出膺刺舉寬簡洽於名  
藩高平形勝太行重阻地邇王畿親賢是屬是用命王

為使持節澤州諸軍事澤州刺史王及大將軍勲官如故朕聞之諸侯之孝在上不驕善人為邦期月而可往欽哉其祇膺顯命率循典禮慎刑罰而設學校尊五美而屏四惡造次於仁夙夜無怠勉追風於往哲以垂裕於後昆可不慎哉

冊祀王金鄜州刺史文

維顯慶四年歲次己未七月庚子朔四日癸卯皇帝若曰於戲昔堯分五典漢總六條所以光闡帝猷式調萌

俗者也爰自近古尤為重任襟帶之地非親不居形勝之藩惟賢是處咨爾益州都督上柱國杞王金岐凝幼彰英徽早茂仁慈表性愛敬因心磐石之固攸歸分符之寄斯在是用命爾為使持節鄜州諸軍事鄜州刺史餘如故夫道德齊禮為政之良規踐義基忠立身之要道必恭謙而下士無驕矜以傲法勉務農之教勤恤隱之方往欽哉其祇朕命緝諧令績可不慎哉

冊曹王明梁州都督文

維顯慶四年歲次己未九月乙亥朔二十九日癸卯皇帝若曰於戲漢川紀奠梁山表鎮南通庸蜀北達褒斜地實要衝人資剛銳式遏之寄親賢攸屬惟爾上柱國曹王明志業冲遠襟神爽濟仁惠之風彌著慈和之美日聞析壤分珪既隆於藩屏褰帷按部允期於政績是用命爾為使持節都督梁洋壁集等四州諸軍事梁州刺史王及勲官並如故往欽哉恤隱之任昔人尤重班除之職往哲稱難宜盡公平之心用崇寬恕之道聿遵前

典勉修厥德惟良是屬可不慎歟

冊郇王素節申州刺史文

維顯慶四年歲次己未九月乙亥朔二十九日癸卯皇帝若曰於戲經邦之術寄宗子而維城御下之方資懿親而調俗緬尋遐載率修斯道咨爾上柱國郇王素節端嶷幼彰清徽早茂夙聞詩禮之訓式光車服之寵邑連鐘武壤接平春合九塞之遙途控三門之險路形勝之地馬牧在斯是用命爾為使持節申州諸軍事申州

刺史王及勲官並如故往欽哉夫政化之要禮義為先  
臣子之規忠孝為本爾其慎修刺舉祗服炯戒仰鳴謙  
以自牧無侈縱而違道荷茲隆委可不慎歟

冊紀王慎荊州都督文

維顯慶五年歲次庚申九月癸亥朔二十五日丁卯皇  
帝若曰於戲南紀之津上躔翼軫西浮之路旁帶巴巫  
信形勝之大澤實英靈之興府恤隱之寄懿親攸屬班  
條之美良翰爰歸左衛大將軍澤州刺史上柱國紀王

慎漸天漢而含潤資日觀以摘華藝重三雍道優二陝  
梁地挺彥燕館趨賢位表銜珠入光蘭錡職華分竹出  
美棠陰簡惠以孚聲績斯卽是用命爾為使持節都督  
荊岐岳朗等四州諸軍事荊州刺史大將軍上柱國王  
並如故往欽哉夫道德齊禮布政之化踐孝依仁立身  
之本必宜周旋勿墜雅譽彌高勉修廼職對揚休命可  
不慎歟

冊周王顯并州都督文

維龍朔元年歲次辛酉十月癸亥朔十七日己卯皇帝  
若曰夫騰華星苑榮名區於藩維憑暉日御峻寵章於  
侯服故本枝增蔚鴻緒滋繁而汾陽與區鎮龍山而控  
遼冀方沃壤接雁塞而䟽疆連率之寄親賢攸屬咨爾  
洛州牧上柱國周王顯風則開秀器彰虛明識表魏舟  
之象詞掩漢臺之駕西園孤月委心鏡而齊明小山叢  
桂偃情田而並烈溫恭夙幼業尚日新棣萼交芬珪璋  
具美是用命爾為使持節都督并汾箕嵐等四州諸軍事

并州刺史牧又勲封並如故爾其克修天爵聿苞地義  
方資化敷大夏惠漸京陵必宜缺衽鳴撫蹇帷廣聰  
懋宣聲績長綏福履光膺顯命可不慎歟

冊號王鳳青州刺史文

維麟德元年歲次甲子正月己酉朔二十一日己巳皇  
帝若曰於戲剪商胙邑寵秩盛於隆周懋秦啟社嶽名  
崇於有漢況乎爵窮五等榮總六條乃茂德之攸升因  
非賢而靡擇沁州刺史上柱國號王鳳履局端嚴襟神

秀整道光懿威望重宗維恭慎之心符小言而緝譽虛  
凝之度包大雅而揚聲體被剛柔藝殫文武騰芳桂嶽  
動貞韻而鏘金寫照荷池嚮清文而振玉若乃溜源迥  
跨岱趾斜臨人被萊風俗兼齊舊布中和之化申簡惠  
之方觀政所先建親斯在是用命王為使持節青州諸  
軍事青州刺史勲封如故往欽哉王其克邁十倫稽往  
賢之峻躅勳宣九德蹈前哲之英規絕浮競之津廣貞  
淳之路光昭淑問可不慎歟

冊曹王明號州刺史文

維麟德元年歲次甲子正月己酉朔二十二日庚午皇帝若曰於戲金楨璿萼分器先於茂親丹帷皂蓋按部盛於良牧藩條之寄載宣河潤之資斯遠固以聲芳偃桂德秀坐棠惟爾涼州都督上柱國曹王明幼範趨庭風識韶悟姿儀挺立豪春靈而馳賞絃秋竹而舒襟詞彩星稠對梁珠而混色情源永徹帶趙璧而交輝韜兩獻而選驤籠二武而孤峙是用命爾為使持節號州諸

卷三十七  
軍事號州刺史勲封並如故往欽哉爾其履謙居異念  
損辭豐置醴以挹儒津賜田以登文囿敬光橋梓貞返  
修筠當率由舊章永保疆宇可不慎歟

冊江王元祥鄜州刺史文

維麟德元年歲次甲子正月己酉朔二十二日庚午皇  
帝若曰於戲列爵開基資連屬而敷化班條馭富藉藩  
衛而裁風是知光闡帝猷發揮人極固宗屬而兼列必  
親賢而並建鄧州刺史上柱國江王元祥識尚閑偉體

局貞凝履順而自居冲撝而待物梁臺既啟背淮之裾  
爰萃燕宮載闢發洧之駕相趨甄綜掩於河書精通符  
於沛易神遺糾察政叶寬平包吐茹之竒遞弦韋之用  
乃地鄰京翊俗裕於五方壤密褰封潤沾於九里是用  
命王為使持節鄜州諸軍事鄜州刺史勲封並如故往  
欽哉懋德惟忠持盈在約思勤躬而景問無弛度以虧  
名崇簡正之規邁安恒之節祇膺寵命可不慎歟

冊殷王旭輪單于大都護文

維麟德九年歲次甲子二月己卯朔九日丁亥皇帝若  
曰於戲帝子之星憑紫潯而啟耀天孫之嶽峙青甸而  
摘光故慶表裁梧德成觀梓皇跼叡屏聲孚地軸之西  
儲秀英藩颺偃宸街之北冀州大都督上柱國殷王旭  
輪金禎挺秀玉頰曾敷姿表淹凝器彩閒潤淮南之鏡  
混冲照於髻辰睢陽之藻齊洪輝於綺日綠車就駕朱  
邸洞開勝道招英賜田期彥蕙列清風宣芳於大雅  
蓋承流月澄華於高義固以聯崇躅於河楚茂疊軌

於鄧郃是用命爾為單于大都護大都督兼勲封並如  
故往欽哉其緘訓趨庭兢業履薄方資威橫雁塞惠漸  
龍沙光膺朝獎可不祇慎

冊紀王慎邢州刺史文

維總章二年歲次己巳

關

月庚寅朔十二日辛丑皇帝

若曰於戲昔封唐御極分嶽以鎮寰區宅鎬桑時建侯  
以隆藩衛用能發輝鼎祚翊贊昌圖制犬牙以廓地基  
茂麟趾而光天緒懿親啟翰其理則然惟爾使持節澤

州諸軍事澤州刺史上柱國紀王慎稟慶星躔分華帝  
圃器表冲邈軌鑒端凝業蘊珪璋藝包文武振英詞於  
五陵桂嶽而含芳抗送議於三雍警蘋風而鼓譽仁  
孝為立身之本貞恕存應物之方及疏社上東建旗南  
服化流江漢道被歌謠中壘訓兵自穆銜珠之序長淮  
平俗式崇露冕之規冠雅政於羣邦標粹範於賢牧夷  
儀勝壤地乃邢遷跨令趙之郊畿總常山之襟要維域  
之寄僉曰爾諧是用命爾為使持節邢州諸軍事邢州

刺史上柱國王如故往欽哉爾其光闡六條敷崇四誠  
考間平之令則酌魯衛之嘉猷無以傲從康無以縱敗  
禮迪於正典聿遵王度祇歷茂寵可不勗歟

冊曹王明豫州刺史文

維總章二年歲次乙巳三月己卯朔十三日辛卯皇帝  
若曰於戲夫鄴京統歷䟽青社以建侯炎漢握圖錫丹  
書而分國固以剪桐作屏寶寄於周親剖竹開藩允屬  
於良牧睦言遐載諒乃通規惟爾使持節號州諸軍事

虢州刺史上柱國曹王明濯秀銀潢擣華璇極端潔成  
性自叶於遊蘭孝敬為心有踰於訓梓駢精秘象驗封  
蟻之登辭披翰小山見騰塵之入頌業隆燕館道謁梁  
闡累播循風薦敷簡政飛蝗感化不犯漢中之田猛獸  
懷仁述避弘農之境若乃荊河與壤井賦萬家周楚舊  
郊屬城千里形勝之地非親勿居是用命爾為使持節  
豫州諸軍事豫州刺史上柱國王如故往欽哉爾其班  
條述職務盡於勤誠求瘼庀人事歸於平恕祇服烟戒

勉修厥德維城之重可不慎歟

冊趙王福梁州都督文

維總章三年歲次庚申二月甲辰朔九日壬子皇帝若  
曰於戲夫姬祚斯永分瑞玉以建侯漢歷載融剖銅符  
而作鎮然則道光宗懿方膺錫社之榮跡著循良實允  
班條之寄惟爾隰州刺史上柱國趙王福摛祥丹極毓  
慶立樞邁德為資體仁成性趨庭演訓先承喻梓之恩  
樹屏凝規夙奉裁梧之命樂善無倦率禮無憊從茲臨

藩振英風於桂嶼褰帷按部流惠化於棠陰固以瑋美  
鄴郇均聲河楚若乃華陽舊壤山抗西傾導漾名區地  
分南鄭瞻言形勝諒在親賢是用命爾為使持節都督  
梁壁洋集四州諸軍事梁州刺史上柱國王如故往欽  
哉爾其靖共乃位聿遵前典勗貞恪之心務廉平之政  
茂對休寵可不慎歟

冊周王顯左衛大將軍文

維儀鳳二年歲次丁丑二月甲午朔十二日乙巳天皇

若曰於戲上圖圓極星躔分帝子之象下奠方典列野  
宅天孫之鎮緬綴千古尚想百王法靈臺以啟封俾親  
賢而作輔是以軒丘御歷爰錫蒼林之祚幽室建侯載  
疏曲阜之邑用能崇寶統贊昌期盛業茂於本枝鴻基  
峻於磐石惟爾洛州牧益州大都督兼太子左衛率使  
持節洮河道行軍元帥蔡州鎮撫上柱國周王顯高祺  
薦祉甫應瑤筐仙域啟禎載分金榜迪中和之粹質蘊  
上德之良規風識俊邁機神爽徹純襟洽地義之方弟

性睦天倫之重發揮沛易隱括河書多材之美載光樂  
善之風逾振泊乎遙臨西蜀控玉宇之全邦近牧東周  
闢銅衢之興壤少城故地不變歌廉之俗太室餘萌載  
陶分陝之化總戎未舉威已訢於三羗作鎮方崇聲遠  
馳於萬里若乃左軍望重前馳任隆司鶚弁於宸階統  
熊渠於禁衛寔惟心膂之要斯謂爪牙之職廼睠鷹揚  
寄於麟趾追踪漢屏外列驃騎之班繼美晉藩初極領  
軍之選是用命爾為左衛大將軍餘官勲封如故惟天

遵物厥命弗常惟人立躬在心則應性之所賦邪正由  
乎積習事之所通感名同於影響祇畏之道賢哲同歸  
欽哉往敷乃訓率由前則竭愛敬之情砥溫恭之行在  
泰思損据寵思危無耽樂是從非禮義勿踐永保朕命  
以蕃王室誕綏福祉可不慎歟

冊親王出將文

維大曆五年歲次庚戌三月丁巳朔十六日壬申皇帝  
使某官乙持節冊命曰於戲昔武德貞觀之際親賢兼

叙中外大寧多以藩王委之方面玄宗震耀威武外攘  
夷狄亦選建明德時惟薦揚予之茅土並賜旄鉞祇奉  
前訓敢忘夙夜爰命小子統茲元戎某英茂有才寬簡  
彰信豈孝恭之外至亦禮讓而中發能辨雅樂尤精善  
書言表於微獨有所得事迫於悔未嘗復行時因講藝  
之餘兼達理戎之要固可總以文武屏於家邦屬河外  
名都方缺上將難於大任歷選中朝雖慚知子之明不  
忝安邊之寄錫以戎輅分以兵符撫其四封式是羣帥

仍求素望俾副新軍爾其保靖疆土惠安氓俗服我明訓永孚於休

冊親王出將文

維大厯六年歲次辛亥五月壬辰朔十六日丁未皇帝使某官某乙持節冊命曰於戲周之藩翰選用宗盟則懷德惟寧大邦惟屏也漢之郡國分建子弟則燕代遼遼齊趙慚悔已莫不賦兼千乘土過數圻賜鈇鉞以專征叅卿士而夾輔拜之於廟命之於庭俾其外合羣后

同獎王室是用師古率由至公某王幼奉君親之訓兼  
承保傳之戒罔敢失墜勤而行之忠肅孝恭資其令德  
溫良聰達輔以多才辨正五經之儒采述三雍之樂不  
自矜尚過於謙冲周旋體仁恒久其道懿此休問流於  
四方朕往統藩麾嘗親戎畧諸子侍從或有所聞時與  
之言頗詳其旨必能當我朝寄叶於師貞仍選輔車委  
任留府錫以彤弓之寵稱其綠車之尊爾其祇承大訓  
以率諸夏敬茲厥服無廢朕命



唐大詔令集卷三十七

欽定四庫全書

唐大詔令集卷三十八

宋 宋敏求 編

諸王

加實封

潞王周王上柱國別食實封制

加相王封制

加邠王守禮實封制

慶王等食實封制

遜佐

溫王遜位制

封郡王

降親王為郡王制

封某王男某郡王制

封懷寧郡王制

嗣江王禕封郡王制

加樂安郡王實封制

封廣平郡王等制

封皇太子男寧平原郡王等制

封諸王男為郡王制

冊郡王

冊趙王孝恭改封河間郡王文

冊隴西郡王博乂特進司宗卿文

冊漢中王瑀文

除郡王官

淮安王神通等開府儀同三司制

壽春郡王成器左贊善大夫制

信安郡王禕滑州刺史制

褒信郡王璆宗正卿制

濮陽郡王澈宗正卿制

廣武郡王承宏光祿卿制

信安王禕太子太師制

封嗣王

加嗣陳王實封制

封嗣濮王制

封嗣蔣王制

封嗣荊王制

嗣江王食實封制

封嗣密王制

封嗣曹王制

封嗣信王制

冊嗣王

冊嗣澤王文

除嗣王官

嗣澤王珣國子司業制

嗣虢王邕同知內外閑廐勅

嗣鄭王希言右衛大將軍制

嗣吳王祗右衛將軍制

嗣許王瓘太子詹事制

嗣道王鍊雲安等五郡節度等使制

嗣虢王巨西京留守制

嗣吳王祗太子賓客制

嗣虢王溥太僕少卿制

嗣鄭王遜大理卿制

諸王男

諸王男等加封邑制

加實封

潞王周王上柱國別食實封制

門下維城道峻理恢於邑壤分社寄隆義先於榮秩雍  
州牧潞王賢潞州牧周王顯瑤極披禎璇源發彩令聞  
彰於詩禮英徽表於岐嶷戎章之寵宜允於具瞻膏腴  
之恩式遵於故事並可上柱國各加別食實封一千戶  
餘如故

加相王封制

鸞臺尊王子弟分裂山河式優征賦永固藩屏并州牧  
左衛大將軍太子左千牛衛率兼安北大都護相王地  
惟茂親躬此明德性安卑薄誠切冲讓頃以所食相州  
願入天府章表懇到至於再三朕難違固請曲成美志  
然以王國所費觸類宏多漢晉已來寵錫彌盛或食邑  
五萬戶或連城數十里壽遂其覽分之情忘其推恩之  
典宜於相州加實封一萬戶主者施行

加邠王守禮實封制

門下酬庸懋賞允屬親賢利建疏封式固藩屏光祿勳  
兼左金吾衛大將軍邠王守禮器資文武節蘊忠貞容  
範霞軒孝友天至豈如服儒歸美諒以樂善稱仁載叶  
推恩增其井賦伴夫作輸誓以山河可加闕

慶王等食實封制

門下先王之制建封有等諸侯所食征賦以歸河西軍  
經畧節度等大使涼州都督慶王潭河東道諸軍州節  
度大使太原牧棣王洽河北道諸軍州經畧節度大使

幽州大都督鄂王潤等性皆中和行無外飾教以詩書  
能漸義方雖已裂於封圻竟未疇於井賦頃以孝友之  
性且在深宮服用之間亦從御府既申開國之典宜崇  
書社之數可各食邑實封二千戶主者施行

遜

溫王遜佐制

自古帝王必有符命兄弟相及存諸典禮朕以孤藐遭  
家多難顧茲蒙識未曉政術茫茫四海將何所屬累聖

丕業若墜於地王室多故宜擇長君思與羣公推崇明  
聖叔父相王高宗之子昔以天下讓於先帝孝友寬裕  
彰信兆人神龍之初已有明旨將立太弟以為副君為  
王懇辭未行冊命所以東宮曠位於今歷年綴衣在辰  
禍變倉卒後掖稱制計主冲人欽奉前懷式遵理命上  
申先帝之意下遂黔黎之心俯稽圖緯之文仰跂祖宗  
之烈起今日請叔父相王即皇帝位朕退守舊藩歸於  
外即凡百卿士敬承朕言克贊我天人之休期以光我

有唐之鴻業布告遐邇咸使聞知

唐隆元年

### 封郡王

#### 降親王為郡王制

鸞臺樹之藩屏所以固本枝也裁其親疎所以明秩叙也  
緬惟上古欽若至公君不徒授臣不虛受乘列星而挹  
爵祿候風景而行慶賞則固以義形廉讓道叶變通者  
焉某周公之胤地侔曲阜楚王之孫業盛平陸負戴忠  
孝踐履溫恭每以車服數隆井賦秩廣清問之際陳

乞情實顧存優禮且期後命令者頻詣闕庭累申華表  
志不可奪誠難固違宜旌謙損以鎮浮競可封某郡王  
食邑五千戶實封六百戶

封某王男某郡王制

鸞臺睦親之規既隆於敦叙建侯之典或綿於恩澤某  
王弟若干男某璿萼疏翹珠泉演派金相玉質形於載  
誕之初芝秀蘭芳表於克岐之日淳深發其天性韶令  
觀其月將可以內茂本枝外光維翰綠車承貺載延宗

威之輝朱紱斯皇宜啟山河之賦可封某郡王

封懷寧郡王制

建侯樹藩命賢列土以敦戚屬乃率典常司徒兼絳州  
刺史上柱國申王撫玉林分彩銀河疏液靡保慶靈未  
繁肩緒宋王憲男嗣英魯庭學禮楚館聞詩德輝日盛  
忠槩時立宜其擇猶子之序居承嫡之位盧江大都形  
勝攸屬用圖爾居莫如茲地是錫分珪之寶俾成磐石  
之宗可封懷寧郡王食邑三千戶

開元七年正月

嗣江王禕封郡王制

國之宗盟樹以藩屏用親九族以制萬邦朕恭默思道  
懋勤庶政將欲克復古訓貽範方來頃以王國絕紀旁  
宗入繼事非允正奚妨命停而立愛自親推恩由近雖  
禮云異情所未忘況其嗣侯已積年歲永言主祭因心  
怵惕宜降殊常之澤俾申敦睦之道再從兄將作大匠嗣  
江王禕為信安郡王蜀王禕為廣漢郡王再從叔太子  
員外率更令嗣密王徹為濮陽郡王再從兄太子員外

家令嗣越王闕

為中山郡王

開元十二年四月

加樂安郡王實封制

門下兄弟之子於近屬而特深恩禮之情在諸孤而更切故惠宣太子男守鴻臚卿樂安郡王瓊等咸自砥礪克修名檢纘承先緒休有令聞能榮曲阜之封不忝高陽之族念往之恨已無追於百身撫存之恩宜受賜於千室可共食實封一千戶王者施行

開元二十五年七月

封廣平郡王等制

分命本枝列於庶佐博考方冊斯為大猷皇太子之子  
叔等觀其器識日以通敏仁智之性自然忠孝之誠克  
備率由禮度能稟義方業既著於崇儒材可使於從政  
爰茲拜職宜從紫綬之榮勉爾脩身式副綠車之寵可  
封叔為廣平郡王僖為南陽郡王倓為建寧郡王倔為  
西平郡王僅為新城郡王倖為潁川郡王封慶王之子  
儼為新平郡王仲為平原郡王棣王之子僕為汝南郡  
王僑為宜都郡王縈王之子輔為濟陽郡王偕為北平

郡王儀王之子伉為豫章郡王健為闕陵郡王頴王之

子仲為滎陽郡王永王之子陽為襄城郡王壽王之子

任為河間郡王延王之子倬為彭城郡王濟王之子儵

為永嘉郡王

開元二十八年九月

### 封皇太子男寧平原郡王等制

王者嗣統必上尊祖廟中立人紀下及孫謀所以光贊

鴻猷發揮大典者也皇太子大男寧等溫敏茂淑依仁

游藝戲齡之歲自降其心詩禮之訓夙聞於耳朕初建

儲兩永固宗祧既當知子之明彌稱抱孫之慰是用依  
方辨色藉土疏疆俾奉邦家式崇藩屏本支百代會協  
於周詩子弟畢封更隆於漢室於戲承紫極之慶稟青  
宮之訓惟師友是敬惟忠孝是憑以善為心好賢為德  
古有成範爾其欽哉

正元二十  
一年四月

封諸王男為郡王制

王者子弟畢封藩戚並建所以式固磐石克茂本枝故  
澧王大男漢可封東陽郡王第二男源可封安陸郡王

第三男潢可封臨川郡王故深王大男可封河內郡王  
第二男淑可封吳興郡王故絳王大男洙可封新安郡  
王第二男濟可封高平郡王故洋王大男沛可封潁川  
郡王溜王男澣可封許昌郡王沔王大男瀛可封晉陵  
郡王初王大男溥可封平陽郡王仍並賜光祿大夫宜  
令所司擇日冊命

太和八年八月

冊郡王

冊趙王孝恭改封河間郡王文 岑文本

維貞觀某年月日甲子皇帝若曰於戲肇有君長司牧  
黎元雖步驟殊時損益異術至於建親勲而作屏陳龜  
鼎於無窮其揆一也惟爾光祿大夫行晉州刺史趙郡  
王孝恭器識弘通風畧宏瞻親猶凡蔣佐比燕荆皇運  
權輿寰區未乂擁節西驚靖巴漢之妖氛受鉞南伐戮  
荆吳之蛇豕誠著經綸功宣方面及入參禮閣出總藩  
麾令望先於縉紳惠化洽於謠俗析珪之重允屬勲庸  
按部之榮義存帶礪是用命爾為使持節觀州諸軍事

觀州刺史改封河間郡王傳之子孫永為唐輔往欽哉  
爾其勉茲忠孝鑒於典禮勤恤民隱無棄朕命可不慎  
歟

冊隴西郡王博乂特進司宗卿文

維龍朔三年歲次癸亥十二月庚辰朔二十四日癸卯  
皇帝若曰於戲睦親之訓理鏡於遙圖章戚之規道光  
於絕簡若乃年耆德懋屬重望隆釋釐綜之勞遂優閑  
之禮惟爾光祿大夫司禮太常伯隴西郡王博乂發慶

秩宗䟽翹靈派資忠峻業襲義揚風懷匪磷之貞心凌  
後凋之勁節榮兼中外效宣文武至乃彰組文昌外贊  
清覽頻致由表之請累申降階之謁雖鎮茲雅俗載佇  
於芳猷而爰靜澆馳重違於撫尚是用命爾為特進行  
司宗正卿封如故往欽哉秩亞青槐朝請之恩斯切禮  
華丹棘序錄之任攸歸恩邁前徽齊蹤往哲光膺寵命  
可不慎歟

冊漢中王瑀文

賈至

維天寶十五載歲次景申七月戊子朔日皇帝若曰咨  
爾漢中王瑤裊御史中丞魏仲犀王室多難凶逆未誅  
是用建爾子姓以為藩屏命爾忠良以攝傅相安危繫  
是舉可不慎歟夫王侯之體則以任能從諫為本親賢  
仗信為則以好問樂善為心安仁容衆為節然後能建其  
功業夾輔王室是以漢之宗王多委政守相故能享祚  
長久令聞不已朕聞汝瑤能寬大儉約樂善好賢敦說  
詩書動必由正而久於高簡未習政途又聞仲犀才幹

振舉憂勤庶績必能固爾磐石匡補闕漏軍旅之事必委其專獄訟之煩必與其決簡賢任能必使其舉懲惡勸善必任其斷惟協惟睦其政乃成同德合義何往不濟於戲瑤其鎮撫黎人莊肅守位仲犀其悉心戮力贊我維城則瑤有任賢之名犀有忠勤之績匡復社稷戡定寇讎在此行也勗哉其無替朕命

除郡王官

淮安王神通等開府儀同三司制

褒崇賢戚有國彝典厚秩清階式隆朝望左武衛大將軍上柱國淮安王神通宗室之長德器優宏締構之功早樹勲績右武衛大將軍上柱國燕郡王藝夙著嘉庸志懷寢強久司戎禁見稱貞確宜加榮寵式允具瞻並可開府儀同三司

壽春郡王成器左贊善大夫制

鸞臺相王旦男壽春郡王成器毓彩桂山承規椒掖韶容霞舉美志月將望苑翹英瑤山佇俊宜參多士之選

俾從政又之列可依前件

信安郡王禕滑州刺史制

門下訓俗安人是資良牧棄瑕錄用茲為令典使持節  
衛州刺史信安郡王禕器能之美宗室所推才堪應務  
久當於任委防缺周身因從於降黜惟推念舊義在睦  
親宜迴傳於方外俾分符於近服可滑州刺史

襲信郡王璆宗正卿制

孫逖

門下公族之任得之則難舉親而官選舊惟允銀青光

祿大夫殿中監上柱國褒信郡王璆雅性恭友虛懷敏  
達近屬藩翰中朝羽儀無競維人不矜於富貴克勤於  
位每效於忠公敦叙是司疇咨所屬宜迴六尚之職以  
副九宗之委可宗正卿

濮陽郡王澈宗正卿制

孫逖

門下宗卿設位邦族是司必擇親賢以光名器金紫光  
祿大夫行太僕卿員外置同正員上柱國濮陽郡王澈  
清貞履道淑慎持身行無越思動不踰矩以才從政於

歷官而則深以地推恩在同姓而為近敦叙之任疇咨  
所難宜受寄於本枝更遷榮於列棘可行宗正卿散官  
勲如故

廣武郡王承宏光祿卿制

孫逖

門下銀青光祿大夫行房州別駕員外置同正員廣武  
郡王承宏地在維城慶延分土頃乖周慎因從降黜捨  
其小犯用申猶子之恩復其舊資俾踐列卿之秩可光  
祿大夫光祿卿員外置同正員

信安王禕太子太師制

門下傳導元子師長庶寮必在正人無非舊德太子太  
師上柱國信安王禕宗室良翰朝廷碩老踐忠公而立  
節體明肅而成用頃膺大任頻摠中權掌夏司春允為  
六官之長戢兵禁暴何止萬人之敵睦親尚齒念舊錄  
功宜優天秩之榮俾極宮臣之位可光祿大夫守太子  
太師勲封如故

封嗣王

加嗣陳王實封制

鸞臺睦親之道推恩之義家國所同古今無異雲麾將  
軍行太子左鶴禁率嗣陳王延暉地承枝葉咸在葭莩  
幼聞詩禮躬踐名教賞勸未酬井邑猶虛宜申優典用  
光近族延暉兄弟可別令實封一百五十戶

封嗣濮王制

門下姬運睦親曲阜祚周公之嗣漢廷繼緒荆舒紹元  
王之封所以宗子維城本支百世也故嗣濮王餘慶構

北極天分源帶地通五演之餘潤承九秀之曾暉稟訓  
梁園冠池筠而振彩承規淮岫掩巖桂而揚芬往屬艱  
虞苴茅中絕今逢開泰枝庶畢侯宜承井賦之榮以永  
山河之誓可封嗣濮王仍食實封四百戶

封嗣蔣王制

門下魯肩曹裔並為建國文昭武穆克紹明禮所以諸  
侯夾輔宗子維城帶礪山河藩屏社稷自大運中圯天  
步多艱磐石之基剪焉落構今皇圖再纘昀祚維新興

廢繼絕尚遺凡蔣格於藝祖震悼良深故蔣王惲宗室  
羽儀國朝賢懿享祭無主觀守丘荒非所以敦叙九族  
盛隆百代之義也嗣王煒第三子銑男左千牛衛長史紹宗雖  
以沉淪之間未光天秩而瓌姿傑氣惟曰象賢可封嗣  
蔣王以食舊德賜食實封四百戶

封嗣荆王制

門下敦族睦親疇咨前代脩廢繼絕率由舊典故荆王  
元景嫡孫沈黎縣開國侯長沙男逖再從叔祖故梁

郡開國公孝逸第五男瑑等慶協家邦緒聯戚屬預聞  
禮訓夙踐義方夙藉桐珪之業合循茅土之制頃以維城  
中北宗室多艱賜命弛廢宅居播越今皇基重建國步  
永康思樹本枝載昌綿秩是用分封子弟大誓山河俾  
夫作扞京師為我藩屏宜以遐嗣封荊王仍賜實封四  
百戶瑑可襲封梁郡開國公食邑二千戶

嗣江王食實封制

門下列爵王侯是歸於藩屏推恩子弟用隆於井賦尚

乘奉御有闕先授嗣鄧康王伯潛太子僕兼徐州別駕  
嗣江王禕等文昭武穆夙延殊獎沛易河詩嘗聞雅訓  
忠謹恭懿明敏博通逸思泉奔冲情霞舉中山謝其文  
藻北海慚其經術永言興繼載擇親賢析珪受璽惟允  
分封之命保國又人宜光實食之典可食實封

冊嗣密王制

興滅國繼絕代天下歸心焉况乃仁不遺親德必在祀  
光復土宇率由教義者哉徐州刺史密王元曉望重天

人地居藩屏家邦依賴休戚是均乃者王室多難睿圖  
中缺凡我宗子咸從殛竄神龍初歲寶運紹興爰命近  
屬以為後嗣而脩緒凋翳是非紛雜曇子乘隙妄尸茅  
土神其不歆非類人亦奚祀非族奠享無主永懷惻然  
其封元曉姪孫銀青光祿大夫行太僕少卿員外置同  
正員東筦郡開國公徹為嗣密王以奉其祀

開元五  
年五月

### 封嗣曹王制

朕因暇日嘗幸戚藩引見諸王爰加錫宴而故信王孫

林行列之間皤然白首問其年齒則七十而有七詢其  
昭穆則玄宗之雲孫朕仰思開元之時盛明之理繼體  
承訓迨於朕躬惕然動懷當食興嘆况尊祖之義立愛  
自親尚齒之文由家刑國觀其威儀甚整視聽不衰載  
懷愍矜所宜敬異永惟烈祖之德用錫孝孫之慶旌其  
祚胤特舉徽章遽外開府之秩寵以分茅之貴俾從異  
等式示殊恩可嗣信王仍賜開府儀同三司

開成元  
年八月

冊嗣王

冊嗣澤王文

蘓頌

維景龍四年歲次庚戌五月辛亥朔二十八日戊寅應  
天神皇帝若曰夫親先之義始自家國嫡後之封終傳  
上宇咨爾故澤王男義瑾授桐貽緒訓梓垂芳性與宜  
於禮樂行盡成其忠孝是知周之曲阜元子建侯漢之  
平臺其王襲父推其繼美俾爾宜乎是用命爾為嗣澤  
王於戲率由軌訓祇服彝典故可以不驕不矜廼惠廼  
順北暨於上黨南臨於太行偉其井邑光我藩屏往欽

哉

除嗣王官

嗣澤王珣國子司業制

門下嗣澤王珣承派咸池分輝扶景錫珪前寵纂周典  
之親賢磐石今隆高漢朝之子弟機彩明悟神情峻拔  
雅景夙成宏才早著儒庠教胄資適於下帷蕃郡理人  
允求於別乘衣冠就秩宜班列位之榮井賦開疆仍茂  
承家之業可國子司業

嗣虢王邕同知內外閑廐勅

蘇頲

勅騏驎伏阜軍國為容苟非懿親莫允斯寄秘書監檢校殿中監嗣虢王邕地隆藩屏才蘊忠賢以河間之碩儒膺舞陽之茂寵學窮四徹已綜圖書任司六尚式光軒冕必能駟馬舉筭兩驂執轡用聞玉臺之歌入侍瑤池之賞宜與張涉同知內外閑廐餘如故

景龍三年十二月十二日

嗣鄭王希言右衛大將軍制

蘇頲

門下銀青光祿大夫太僕卿員外置同正員上柱國嗣

鄭王希言才推近屬行稟中和用沉晦以為謀體直方而成器頻外列棘之位嘗踐執金之秩歷官斯久更事逾深必在親賢用膺心膂宜領右軍之寄仍直大將之任可雲麾將軍守右衛大將軍勲如故

嗣吳王祗右衛將軍等制

孫逖

門下左衛將軍吳王祗等國之近屬朝之多士或班聯警衛有避於天倫或列位周已行淹於歲序各移官命用廣朝恩可依前件

嗣許王瓘太子詹事制

孫述

門下宮僚之首必擇正人邦圻之內實資良牧銀青光祿大夫秘書監上柱國許王瓘文儒致位所謂宗英銀青光祿大夫守太子詹事上柱國太原郡開國公暉言行立誠是稱親懿常以善而為樂每執謙而忘倦從政已多議能惟允弼違是屬宜肅事於東宮理劇允難俾安人於左輔瓘可太子詹事暉可使持節同州諸軍事守同州刺史散官勲如故

嗣道王鍊雲安等五郡節度等使制

賈至

勅衛尉少卿嗣道王鍊簡約忠諒既直而溫鎮守南服  
黎人用乂且三峡艱阻四方多虞按撫緝熙宜分權總  
俾爾攬轡固茲磐石可充雲安夷陵南浦南平巴東等  
五郡節度採訪處置防禦等使

至德二載  
正月五日

嗣虢王巨西京留守制

賈至

勅京師初復宮室始清可擇宗臣俾之居守銀青光祿

大夫守太子少保嗣虢王巨惠和忠諒貞幹含弘嘗處  
節制之權更居師傅之任嘉猷允塞茂績居多可以固  
我維城殿茲邦國可權充西京留守餘如故

至德二年九月二十

九日

嗣吳王祗太子賓客制

常袞

勅古者選孝弟閎博有道術者輔翼太子今以宗室之  
老處師賓之位亦親而教敬也光祿大夫檢校工部尚  
書兼宗正卿上柱國嗣吳王祗文昭之慶蔚於公族楚

元之後繼有忠賢達道虛懷寬厚廉謹藩翰舊德人倫  
憲行更於內外職事頗修年在華皓未嘗衰墮叅會府  
而百工時叙掌宗卿而九族益親每託肺腑深加優禮  
宜以冬官之重仍在春儲之列可兼太子賓客其檢校  
工部尚書及散官勲封如故

嗣虢王溥太僕少卿制

元稹

勅正議大夫行宗正丞嗣虢王溥守隨州司馬員外置  
同正員李逢等昔我憲宗章武皇帝法堯睦族深惟本

枝乃詔執事曰伯父叔季幼子童孫在官各率乃誠無替厥職溥可權知太僕少卿逢可守袁王府長史餘如故

宗正卿嗣鄭王遜大理等制

錢珣

勅九卿問重而顯者大宗正與廷尉實次奉常焉易官而處惟典之章具官遜等皆吾屬之楨幹也而又荷出相容戟之門遜繼分郡符必聞其政久歷庶位咸稱有材克助承忠孝之家踐脩罔墜多所該練揚於縉紳今

載葺京師敬先宗廟資乎集事速以成功而方備法官  
是宜改秩往趨獄務更在勵精伏念旬時獄可知也我  
有其律遜其盡心可依前件

諸王男

諸王男等加封邑制

鸞臺昔子弟咸建姬祚以隆支體畢侯漢國斯永某王  
男某等普谷分彩天池演派金相比映玉樹聯芳垂鬢  
欽愛敬之風總角聞詩禮之訓三雍肇建萬品維新褒

德叙勞式遵行慶之典疏藩樹屏允叶推恩之令可封  
襄陽縣開國男

唐大詔令集卷三十八

欽定四庫全書

唐大詔令集卷三十九

宋 宋敏求 編

諸王

降黜

降魏王泰東萊郡王詔

黜梁王忠庶人詔

降永王璘庶人詔

嗣岐王珍免為庶人詔

渾王湊降封巢縣公制

追復

成王千里還舊官制

收葬

譙王重福三品禮葬詔

收葬絳王詔

聽越王歸葬詔

追贈

皇第三子玄霸追封衛王等制

海陵郡王元吉追封巢王制

謚汴哀王璿制

贈恒山愍王承乾荊州大都督制

贈河東郡王瑾太子少師制

榮王故男贈文安郡王制

太子第二男追封縉雲郡王賜名謹制

冊贈

冊贈渤海王文

降黜

降魏王泰東萊郡王制

詔曰朕聞生育品物莫大於天地愛敬罔極莫重於君  
親是故為臣貴乎盡忠虧之者有罰為子在於行孝違  
之者必誅大則肆之市朝小則終貽戮辱雍州牧相州  
都督左武侯大將軍魏王泰朕之愛子寔所鍾心幼而

聰令頗好文學恩遇極於隆重爵位逾於寵章不思聖  
哲之戒自構驕僭之咎惑讒諛之言信離間之說以承  
乾雖居長嫡久躔疴恙潛有代宗之望靡遵義方之則  
承乾懼其陵奪泰亦日增猜阻爭結朝士競引凶人遂  
使文武之官各有託附親戚之內分立朋黨朕志存公  
道義在無偏彰厥巨釁兩從廢黜非惟作則四海亦乃  
貽範百代可解雍州牧相州都督左武侯大將軍并削  
爵土降為東萊郡王尋改封順陽王於均州為封邑制

宅以處之

黜梁王忠庶人詔

上官儀

東臺朕儲社上玄嗣膺景祚獵先聖之經踐至公之道  
底罰行賞御物同歸房州刺史梁王忠居庶孽之地在  
髻巾之辰柳奭遂良交結無忌頻繁進說勸立東朝朕  
以副宮之位宜遵周道苟非其人不可虛立正以宗臣  
之寄仰在諸公旦夕勤懇難違其意及正嫡升儲退居  
列屏樂善之事紊於賓僚窺怨之詞日盈牀第婦女阿

劉遠有陳告迹其罪狀蓋非一途乃偽作過所入關云  
欲出家逃隱又令急使數詣京師覘候兩宮潛問消息  
自說妖夢戴通天冠喜形於色以邀非望每召經師祀  
龍祈福畫千菩薩願升本位每於晨夕著婦人衣妄有  
猜疑云防細作又嗟嘆柳奭稱其為我悼傷韓瑗情發  
於詞朕初見此言疑生怨謗故遣御史大夫理及中書  
官屬相監推鞠證見非虛然其地則人臣親則人子懷  
姦匿怨一至於斯擢髮論罪良非所喻考之大義應從

極罰皇后情在哀矜興言垂涕再三陳請特希全宥朕  
戚屬之中頻虧國典緬維前載匪徒茲子屬懷於此猶  
深愧嘆特宜屈法降為庶人主者施行

降永王璘庶人詔

詔曰臣子之節君親是奉或志懷干紀當義在滅私蓋  
前王所以持法割恩垂涕行戮言念及此歎息彌深頃  
以克孽亂常關畿暫阻朕乘輿南幸遵古公避狄之仁  
皇帝受命北征興少康復夏之績猶以藩翰所寄非親

莫可永王璘謂能堪事令鎮江陵庶其克保維城有俾  
王室而乃棄分符之任專用鉞之威擅越淮海公行暴  
亂違君父之命既自貽殃走蠻貊之邦欲何逃罪據其  
克悖理合誅夷尚以骨肉之間有所未忍皇帝誠深孝  
友表請哀矜雖綰綬全體禮可行於曩制而削土勿王  
事亦著於前史昔廣州有罪因廢為人常山免誅爰將  
徙地是用矜其萬死屈於九刑宜寬伏鎖之命俾黜析  
珪之典可悉除爵土降為庶人仍於房陵郡安置所由

郡縣勿許東西朕存訓誘勗之忠孝不虞孱懦遂至昏迷申此典章彌增媿歎

嗣岐王珍免為庶人制

經國之制貳則有辟為臣之道將則必誅况親則宗秩義兼家國敢懷逆節自桎嚴刑銀青光祿大夫宗正卿員外置同正員嗣岐王珍志在傾邪行惟險薄頃以寇迹未殄軍國多虞因集不逞之徒潛為亂常之計乃欲遠通叛虜構此克謀以有上封備聞其狀猶以親屬初

亦致疑遂令推按具自承伏且王者立法百代所遵稽  
彼常科罪當殊死以其可諱不忍加刑俾從放黜以申  
寬典宜免為庶人仍於秦州安置至彼捉搦勿許東西  
其同謀左武衛將軍竇如玠試都水使者崔昌右羽林  
軍使劉從諫蔚州長塞鎮將朱融右衛將軍胡列直司  
天臺通玄院高抱素右衛率魏兆內侍省內謁者監王  
道成等九人特宜斬決試太子洗馬兼知司天臺冬官  
正趙非熊陳王府長史陳閑楚州司馬張昂左武衛兵

曹叅軍焦自榮前鳳翔府郡縣主簿李岳國子監館進士張奐等六人特宜決殺駙馬都尉薛履謙同逆謀宜

賜自盡

上元二年四月

漳王湊降封巢縣公制

王者教先立愛義不遺親豈於同氣之中可致異詞之間如或慎修不至註誤有聞構為厲階犯我邦紀未加殛竄尚屈曩章漳王湊手足之親磐石是崇位居寵秩列在戚藩頃多克順之心亦有尚賢之志而滿盈生患

敗覆是圖姦克會同謀議滋及汚我皇化彰於中外初  
駭予衆載驚羣聽尚以未具獄詞猶資審克建侯之命  
姑務從寬於戲朕嗣守宗祧敷弘至教自家之訓未立  
掩義之私敢忘是用降封有醜朝典凡百多士宜諒朕  
懷

追復

成王千里還舊官制

地有二南載懷敦睦罪非七國奄隔休明故左金吾衛

大將軍兼益州都督上柱國成王千里懿親賢德高才  
重器強力幹事獨冠等倫保國又人克成忠義願除凶  
醜翻陷誅夷永言淪沒良深痛悼俾復舊班用加新寵  
可還舊官

收葬

譙王重福三品禮葬詔

集州刺史譙王重福幼則克頑長而險詖幸託體於先  
聖嘗通交於巨逆子而不予自絕於天有國有家莫容

於代往者頗不含忍長令幽繫自大行晏駕韋氏臨朝  
將肆屠滅尤切防衛洎天有成命集於朕躬永懷猶子  
之情庶叶先親之義所宜開置寮屬任隆刺舉冀其悛  
改以怙恩榮而誑誤有徒狂狡未息便即私出均州詐  
乘驛騎至於都下遂逞其謀先犯屯兵次燒左掖計窮  
力屈投河而斃雖人所共棄而邦有常刑我非不慈爾  
自招咎且聞其故有惻於懷昔劉長既沒楚英遂殞以  
禮收葬抑惟舊章屈法申恩宜仍舊寵可以三品禮葬

收葬絳王詔

叔父絳王為逆賊等援立切窺天位無討賊之意遂使  
忠義銜冤及王師擒賊義旅問罪前驅勇氣以致殲殂  
朕伏以太皇太后慈仁思以慰解宜令有司量事收葬  
申恩討賊刑禮之中示乎四方以明朕意

寶歷二年  
十二月

聽越王歸葬詔

越王事迹國史著明枉陷非辜尋已洗雪其子珍他事  
配流數代漂零不還京國玄真弱女孝節卓然啟護四

喪綿歷萬里況是近族必可加恩行路猶或嗟稱朝廷  
固須卹助屢宗正等京兆府與訪越王墳墓報知如不  
是陪陵任附塋卜葬其葬事仍令京兆府接借必使備  
禮葬畢玄真如願住京城便配咸宜觀安置

開成四年六月

### 追贈

皇第三子玄霸等追封衛王制

飾終定謚往代通規追遠贈榮前王令典第三子玄霸  
幼挺岐嶷早茂珪璋楚哀王智雲結髮仁明勝衣敏惠

冀其成立訓以義方未被趨庭遽同過隙興言天枉震悼於懷今王業初隆慶賞伊始既式遵於利建宜稽古於哀榮玄霸可追封衛王謚曰懷智雲可追封楚王謚

曰哀

武德七年七月

故海陵郡王元吉追封巢王制

詔曰有虞受終弘肆赦之典隆周革命篤親親之恩海陵郡王元吉地惟藩翰夙承朝寵陷於不軌得罪君親朕嗣膺靈命無忘敦睦同生之重既切於本支在原之

悼實纏於歲月興言泉壤思備寵章可追封巢王謚仍

依舊

貞觀十六  
年六月

謚汴哀王璿制

門下緣情制禮聖賢所不忘以謚易名古今之同貫故  
右千牛衛大將軍上柱國汴王璿雖在齟齬頗標嶷岐  
率以訓典期於老成裂地而封是崇藩屏享年不永俄  
從夭折秀而不實有以傷嗟宜遵考行之義以備飾終  
之典可謚曰哀

贈恒山愍王承乾荊州大都督等制

門下聖人立言因親以立愛王者垂範追遠以崇德故  
伯祖恒山愍王承乾堂伯贈越州都督象再從兄玘等  
慶藉大宗連華近屬既稱叔父之國亦云兄弟之政短  
長曰命久從於淪沒哀榮有典未洽於褒崇宜贈徽章  
以弘寵敷承乾可贈荊州大都督象可贈郇國公玘可  
懷州刺史

贈河東郡王瑾太子少師制

門下親親以相及先王之道也追遠以歸厚聖人之教也故金紫光祿大夫太僕卿員外置同正員河東郡王瑾克嗣克訓是為懿德方茂枝葉式崇垣翰推恩有寄稟命不融興言遊從良深軫悼宜贈師保之位以備哀榮之典可贈太子少師賻物三百段米麥三百石

榮王故男贈文安郡王制

禮以飾情恩以悼往詢於前訓則有舊章榮王故男像粵在幼冲是稱岐嶷習詩書而日就資友悌於自然方

冀成立克開土宇而龜蒙未錫麟族先凋奄爾淪逝良  
增傷憫宜加贈於苴茅且兼榮於符竹可贈文安郡王  
使持節督武威郡諸軍事應緣喪葬一事已上宜官供  
令京兆少尹程若水充使檢校

太子第二男追封縉雲郡王賜名諱制

親親之義於禮斯重傷悼之戚緣情則深太子故第二  
男性與聰達體資韶令早服龍樓之訓有光麟趾之風  
年始勝衣已彰孝愛方洽弄孫之慶遽悲殤子之魂追

以九命封之二等仍加美稱賁爾徽命可贈揚州大都督封縉雲郡王食邑三千戶賜名諱

大歷三年七月

冊贈

冊贈渤海王文

上官儀

維龍朔二年歲次壬戌五月十五日皇帝使大司成彭陽郡開國侯令狐德棻副使正議大夫行司宰少卿薛敏恭持節冊命曰咨夫存著嘉猷歿膺褒顯所以甄明景行昭紀勲烈況地居懿戚業茂惟貞用式暢情之禮

實光追寵之義惟爾故金紫光祿大夫原州都督渤海  
郡王奉慈器範閑裕風裁淹遠德優時彥望重宗英析  
端名區昇荷推恩之澤分符輿壤累藉宣條之任清白  
聞於朝野威惠暴於毗謳固以功著旂常譽光圖史者  
矣而壽仁時爽貞徽淹謝永言親懿震悼良深是用贈  
王為都督荆陝岳朗四州諸軍事荊州刺史右衛大將  
軍餘如故魂而不昧嘉茲榮寵嗚呼哀哉

唐大詔令集卷三十九